

**ამბროლაურის მუნიციპალიტეტის სკოლისგარეშე სააღმზრდელო დაწესებულებებზე
წვდომის (სამგზავრო გადაყვანის) ხელშეწყობის პროგრამა**

მუხლი 1. პროგრამის მიზნები და ამოცანები

1. „ამბროლაურის მუნიციპალიტეტის სკოლისგარეშე სააღმზრდელო დაწესებულებებზე წვდომის (სამგზავრო გადაყვანის) ხელშეწყობის პროგრამის“ (ტექსტში შემდგომ - „პროგრამა“) მიზანია, ამბროლაურის მუნიციპალიტეტის ტერიტორიაზე მცხოვრები მოსწავლე-ახალგაზრდებისთვის, ქალაქ ამბროლაურში მდებარე სხვადასხვა პროფილის სკოლისგარეშე დაწესებულებების სასწავლო პროგრამების, ასევე მათგან გამომდინარე, თანმდევი ინიციატივების ხელმისაწვდომობის უზრუნველყოფა.

2. პროგრამის ამოცანები:

- ა) ამბროლაურის მუნიციპალიტეტის ტერიტორიაზე, სახელოვნებო და სპორტული სექციების თანაბარი ხელმისაწვდომობის ხელშეწყობა;
- ბ) სხვადასხვა პროფილის სკოლისგარეშე სააღმზრდელო დაწესებულებების სასწავლო პროგრამების თანმდევი ინიციატივებში ახალგაზრდების ჩართულობის უზრუნველყოფა;
- გ) ამბროლაურის მუნიციპალიტეტის სოფლებში მცხოვრები მოზარდების მაქსიმალური ინკლუზია კულტურულ და სპორტულ ღონისძიებებში;
- დ) მოზარდთა სულიერი, ფიზიკური და ინტელექტუალური განვითარების ხელშეწყობა;
- ე) მოზარდებში ცხოვრების ჯანსაღი წესის დამკვიდრება.

მუხლი 2. პროგრამის ბენეფიციარები და ბენეფიტის გაცემის სიხშირე

1. პროგრამის ბენეფიციარებს წარმოადგენენ ამბროლაურის მუნიციპალიტეტის ტერიტორიაზე მცხოვრები მოსწავლე-ახალგაზრდები, რომლებიც რეგისტრირებულნი არიან ქალაქ ამბროლაურში მდებარე არასამეწარმეო (არაკომერციული) იურიდიული პირების სახელოვნებო და სპორტულ ჯგუფებში.

2. პროგრამის ფარგლებში, ამბროლაურის მუნიციპალიტეტის ბიუჯეტიდან, ანაზღაურდება სასწავლო წლის მანძილზე დღეში მოსარგებლის მხოლოდ ორი სამგზავრო გადაყვანა:

- ა) საცხოვრებელი ადგილის/სკოლის მიმდებარე ავტობუსის გაჩერებიდან - ქ. ამბროლაურის ცენტრამდე და უკან;
- ბ) ქ. ამბროლაურის ცენტრიდან - სასწავლო პროგრამებთან დაკავშირებული, თანმდევი ინიციატივების განხორციელების ადგილამდე (ქვეყნის მასშტაბით) და უკან.

მუხლი 3. პროგრამის ადმინისტრირება, განხორციელების ვადები და გრაფიკი

1. სახელოვნებო და სპორტულ დაწესებულებების სასწავლო პროგრამების წვდომის ხელშეწყობის მიზნით, ამ დაწესებულებებთან კონსულტაციის საფუძველზე განისაზღვრება უფასო გადაყვანის დღეები და დაინიშნება სპეციალური რეისები, რომლებიც შესრულდება 2021 წლის მანძილზე, არაუმეტეს 10 (ათი) თვის განმავლობაში.

2. კვირის განმავლობაში მომსახურების მიწოდება უნდა განხორციელდეს:

- ა) არანაკლებ ერთი დღისა მარშრუტებზე:
- ა.ა) სოფელი ნიკორწმინდა - ქ. ამბროლაური - სოფელი ნიკორწმინდა;
- ა.ბ) სოფელი ურავი - ქ. ამბროლაური - სოფელი ურავი;
- ბ) არანაკლებ ორი დღისა მარშრუტზე სოფელი ჭრებალო - ქ. ამბროლაური - სოფელი ჭრებალო.

3. ქვეყნის მასშტაბით გასამართ ღონისძიებებში ჩართულ ახალგაზრდას მომსახურება მიეწოდება საჭიროების შესაბამისად.

4. პროგრამის მიმდინარეობაზე ზედამხედველობას ახორციელებს ამბროლაურის მუნიციპალიტეტის მერიის პირველადი სტრუქტურული ერთეული - განათლების, კულტურის, ძეგლთა დაცვის, სპორტისა და ახალგაზრდობის საქმეთა სამსახური, ეკონომიკისა და ქონების მართვის სამსახურთან ერთად.

მუხლი 4. პროგრამის ფინანსური უზრუნველყოფა

პროგრამა ფინანსდება ამბროლაურის მუნიციპალიტეტის ბიუჯეტიდან და მისი ოდენობა განისაზღვრება პროგრამის ამოქმედების დროს ქ. ამბროლაურის სახელოვნებო და სპორტულ დაწესებულებებში ჩართული აღსაზრდელების რაოდენობის, სახელოვნებო და სპორტული ჯგუფების მეცადინეობების გრაფიკის ინტენსივობის და მგზავრობის საბაზო ტარიფების გათვალისწინებით, ფაქტობრივად განხორციელებული რეისების რაოდენობის შესაბამისად.

მუხლი 5. მოსალოდნელი შედეგი

პროგრამის განხორციელება ხელს შეუწყობს ამბროლაურის მუნიციპალიტეტის ტერიტორიაზე მცხოვრები მოსწავლე-ახალგაზრდების ქალაქ ამბროლაურში მდებარე სახელოვნებო და სპორტულ დაწესებულებებზე თანაბარ ხელმისაწვდომობას, სხვადასხვა პროფილის სკოლისგარეშე სააღმზრდელო დაწესებულებების სასწავლო პროგრამების თანმდევ ინიციატივებში ახალგაზრდების ჩართულობის უზრუნველყოფას და შესაბამისად, მუნიციპალიტეტის სოფლებში მცხოვრები მოზარდების კულტურული და სპორტული უნარების განვითარებას.

მუხლი 6. პროგრამის განხორციელების ვადები

პროგრამის მოქმედების ვადა განისაზღვრება 2021 წლის 01 იანვრიდან 31 დეკემბრის ჩათვლით.

მუხლი 7. დასკვნითი დებულება

პროგრამაში ცვლილებების ინიცირება შეუძლია ამბროლაურის მუნიციპალიტეტის მერს დამოუკიდებლად ან ამბროლაურის მუნიციპალიტეტის მერის პირველადი სტრუქტურული ერთეულის - განათლების, კულტურის, ძეგლთა დაცვის, სპორტისა და ახალგაზრდობის საქმეთა სამსახურის ხელმძღვანელის მიმართვის საფუძველზე.